

ZAKON O IGRAMA NA SREĆU

NESLUŽBENI PREČIŠĆENI TEKST¹

(„Službenim novinama Federacije Bosne i Hercegovine“ br.: 1/02, 40/10)²

I – OPĆE ODREDBE

Član 1.

Ovim zakonom uređuju se: uvjeti, način i subjekti priređivanja igara na sreću, vrste igara na sreću, osnovna načela pravila i raspoređivanja prihoda od igara na sreću, osnivanje, pravni položaj, upravljanje i rukovođenje Lutrijom Bosne i Hercegovine (u daljem tekstu: Lutrija BiH), naknada za priređivanje igara na sreću, nadzor, kazne za prekršaje i druga pitanja od značaja za igre na sreću u Federaciji Bosne i Hercegovine (u daljem tekstu: Federacija). Priređivanje igara na sreću na teritoriji Federacije se realizuje putem Lutrije BiH i pravnih lica registrovanih za privređivanje igara na sreću.

Član 2.

Igrom na sreću, u smislu ovog zakona, smatra se igra u kojoj se učesnicima pruža mogućnost sticanja dobitka u novcu, stvarima ili pravima, pri čemu krajnji rezultat igre ne ovisi o znanju ili umješnosti učesnika u igri, već od slučaja ili nekog neizvjesnog događaja.

Član 3.

Igre na sreću dijele se na: klasične i posebne igre na sreću.

Klasične igre na sreću su igre u kojima učestvuje veći broj učesnika sa namjerom da budu jedini ili djelimični dobitnici unaprijed definisanog fonda dobitaka.

Posebne igre na sreću su igre gdje se pojedinac sam suprotstavlja priređivaču i očekuje dobitak zavisno od visine vlastitog uloga i pravila igre.

Klasične igre na sreću su igre u kojima se unaprijed utvrđuje visina fonda dobitaka i to:

1. lutrija: robna, novčana, robno-novčana, ekspres lutrija, instant lutrija;
2. loto, keno i druge varijante ove igre;
3. sportska prognoza - toto;
4. igre na sistemu automata;
5. TV tombola - bingo;
6. tombola - bingo u zatvorenom prostoru.

Posebne igre na sreću su igre u kojima se unaprijed ne utvrđuje fond dobitaka, i to:

1. igre u kasinu,
2. igre na automatima u posebnim klubovima i drugim napravama s višestrukim ulogom i dobitkom (multiplayer),
3. klađenje na razne rezultate i događaje i sl.

¹ Legalist.ba objavljuje ovaj tekst u dobroj vjeri, smatrajući ga u trenutku objavljivanja ispravnom prečišćenom verzijom zakonskog teksta. Ali, autori i Legalist.ba ne jamče da je objavljena verzija prečišćenog teksta propisa pravno valjana, trenutno važeća ili pravodobno dopunjena i mijenjana, stoga Legalist.ba ne odgovara za štetne posljedice koje mogu nastupiti usljed preuzimanja i korištenja ovog neslužbenog prečišćenog teksta.

² Tekst koji je podvučen su izmjene i dopune objavljene u Službenim novinama Federacije Bosne i Hercegovine“ br.: 40/10.

Član 4.

Učesnik u igri na sreću je lice koje ispunjava uvjete za učestvovanje u pojedinim igrama na sreću, što dokazuje pojedinačnim listićem odnosno drugom potvrdom o uplati, ovisno o vrsti igre u kojoj usudjeluje i pravilima pojedine igre.

Član 5.

Fond dobitaka je dio ukupno uplaćene mase sredstava u svakom kolu pojedine igre na sreću, odnosno vrijednosti emisije srećaka koja se isplaćuje u igri na sreću, u skladu sa ovim zakonom i pravilima igre.

Član 6.

Igre na sreću iz člana 3. ovog zakona se priređuju na osnovu ovog zakona i odobrenja. Klasične igre na sreću priređuju se isključivo putem Lutrije BiH pod uslovima predviđenim ovim zakonom, izuzev igre na sreću tombola – bingo u zatvorenom prostoru koju mogu priređivati druga pravna lica na osnovu odobrenja isključivo u zatvorenim prostorima i ista se ne može javno prenositi. Drugim pravnim licima iz stava 2. ovog člana smatraju se sportska društva i sportski savezi.

Član 7.

Posebne igre na sreću mogu priređivati: Lutrija BiH pod uvjetima predviđenim ovim zakonom i privredna društva koja su registrovana isključivo za konkretnu pojedinu igru na sreću predviđenu ovim zakonom na osnovu odobrenja.

Član 8.

Za isplatu dobitaka u klasičnim igrama na sreću koje priređuje Lutrija BiH jamči Federacija. Za isplatu dobitaka u posebnim igrama na sreću jamči priređivač cjelokupnom svojom imovinom.

Član 9.

Zabavne igre (pod kojima se smatraju igre na računarima, simulatorima, video automatima, fliperima, bilijarima i drugim sličnim automatima koji se stavljaju u pogon pomoću kovanog novca, žetona ili uz naplatu, a u kojima igrač ne može ostvariti dobitak u novcu, stvarima ili pravima) nisu igre na sreću u smislu ovog zakona. Nagradni konkurs i nagradne igre koje priređuju pravna lica u cilju propagande, nisu igre na sreću u smislu ovog zakona i iste se mogu organizovati pod uslovom da se učešće u igri ne naplaćuje posebno, da se nagrade isplaćuju u proizvodima ili uslugama, da se unaprijed uplati 6% od ukupne vrijednosti nagradnoga fonda, i to: ravnomjerno 1,5 % Crvenom križu, „Caritasu“, „Merhametu MDD“ i „Dobrotvoru“ i da se pravila igre, uz pethodno odobrenje Federalnog ministarstva finansija - Federalnog ministarstva financija (u daljem tekstu: Ministarstvo) objave u dnevnoj štampi.

Član 10.

Dopisne igre koje se zasnivaju na geometrijskoj progresiji, dopisivanju i uplaćivanju određenog iznosa sve druge tzv. piramidalne igre nisu igre na sreću u smislu ovog zakona i zabranjene su na teritoriji Federacije.

Član 11.

Igre na sreću putem Interneta nisu igre na sreću u smislu ovog zakona i zabranjene su na teritoriji Federacije.

Član 12.

Igre na sreću ne smiju se priređivati u slobodnim zonama.

II - LUTRIJA BiH

Član 13.

Lutrija BiH je društvo sa ograničenom odgovornošću od posebnog interesa za Federaciju registrovano kod nadležnog suda za priređivanje igara na sreću.

Vlada Federacije BiH (u daljem tekstu: Vlada) preuzima sve obaveze osnivača Lutrije BiH. Djelatnost Lutrije BiH je priređivanje igara na sreću i igara za zabavu, u skladu sa ovim zakonom, i za priređivanje istih Lutriji BiH nije potrebno odobrenje Ministarstva. Na Lutriju BiH se primjenjuju odredbe Zakona o privrednim društvima ("Službene novine Federacije BiH", br. 23/99 i 45/00), ako ovim zakonom nije drugačije propisano.

Član 14.

Organ upravljanja Lutrije BiH je Upravni odbor koji ima pet članova. Članove Upravnog odbora imenuje Vlada.

Član 15.

Lutrija BiH ima Statut kojim se uređuje naročito:

- firma i sjedište,
- djelatnost,
- iznos osnovnog kapitala,
- veličina, raspolaganje i povlačenje udjela i ostale odredbe o udjelima,
- podjela dobiti,
- snošenje rizika i gubitaka,
- upravljanje,
- postavljanje, razrješenje, ovlaštenje, odgovornost, nagrađivanje i ostalo,
- unutrašnja organizacija,
- istupanje i uključivanje članova,
- statusne promjene,
- trajanje i prestanak djelatnosti,
- druga pitanja od značaja za poslovanje,
- izmjene i dopune Statuta.

Statut Lutrije BiH potvrđuje Vlada.

Član 16.

Upravni odbor Lutrije BiH u okviru svojih nadležnosti naročito:

- razmatra i donosi plan poslovanja za narednu godinu,
- razmatra izvještaj o poslovanju za prethodnu godinu i isti dostavlja Ministarstvu na mišljenje i Vladi na usvajanje,
- prilikom podnošenja izvještaja o poslovanju za prethodnu godinu i plana poslovanja za tekuću poslovnu godinu, daje prijedlog Ministarstvu za pripremanje odluke o raspodjeli sredstava ostvarenog prometa Lutrije BiH za tekuću godinu, po odbitku fonda dobitaka na dio koji pripada Federaciji i dio koji ostaje Lutriji BiH za pokriće troškova i razvoj, u skladu sa planom poslovanja,
- donosi odluku o izdavanju srećaka,
- donosi pravila igara na sreću,
- imenuje direktora Lutrije BiH uz saglasnost Ministarstva,

- daje inicijativu za izmjene propisa u oblasti igara na sreću, daje prijedlog Ministarstvu za utvrđivanje ukupnog broja automata za igre na sreću i njihovoj teritorijalnoj raspodjeli u Federaciji,
- predlaže Ministarstvu davanje saglasnosti i verifikaciju ugovora o priređivanju zajedničkih igara na sreću sa lutrijama drugih država, drugog entiteta i drugim specijaliziranim organizacijama.

Član 17.

Odluku o raspodjeli sredstava ostvarenog prometa iz člana 16., alineja treća ovog zakona donosi Vlada Federacije BiH u roku od 30 dana od dana dostavljanja prijedloga Ministarstvu. Dio sredstava koja prema odluci iz stava 1. ovog člana pripadaju Federaciji, nemaju karakter prihoda Lutrije BiH i na iste se ne obračunava porez na dobit.

Od dijela sredstava koji prema odluci iz stava 1. ovoga člana pripadaju Federaciji, 50 % sredstava Vlada Federacije raspodijelit će za financiranje programa koji se odnose na:

- prikupljanje sredstava za oboljelu djecu i mlade od teških bolesti čije se liječenje finansira iz Fonda solidarnosti;
- zaštitu prava djece koja su žrtve zlostavljanja, pedofilije, prosjacenja;
- zadovoljavanje potreba osoba s invaliditetom u smislu poboljšanja životnih uvjeta i njihovih organizacija;
- sudjelovanje u borbi protiv droga i ovisnosti;
- smještaj i utocište žrtvama torture i nasilja;
- amaterski sport radi povećanja sredstava fonda za nagrađivanje pojedinaca za istaknute sportske rezultate u amaterskom sportu;
- promoviranje kulture i tehničke kulture i udruga koje se bave inovacijama za nagradni fond za nagrađivanje inovatora za inovacije od međunarodnog značaja;
- aktivnosti u razvitku civilnoga društva;
- rad javnih kuhinja.

Sredstva iz stava 3. ovoga člana dodjeljuju se po osnovi programa rada i projekata. Nositelji programa i projekata, odnosno organizacije, udruge i dr. podnose zahtjeve za dobivanje sredstava iz stava 2. ovoga člana mjerodavnom federalnom ministarstvu, najkasnije do kraja tekuće za sljedeću godinu.

Raspodjela sredstava vrši se na temelju Pravilnika o kriterijima za raspodjelu sredstava koji donosi Ministarstvo. Povjerenstvo priprema kriterije i dostavlja ih Vladi Federacije na usvajanje. Nakon što Vlada Federacije usvoji kriterije, Povjerenstvo objavljuje javni poziv za prikupljanje zahtjeva za dodjeljivanje sredstava, u kojem navodi i kriterije za raspodjelu. Javni poziv se objavljuje u jednoj od dnevnih novina u Federaciji najkasnije do kraja listopada tekuće godine.

Federalno ministarstvo finansija formira Povjerenstvo koje, do kraja ožujka tekuće godine, utvrđuje prijedlog raspodjele sredstava iz stava 3. ovoga člana i dostavlja Vladi Federacije na usvajanje. Povjerenstvo je sastavljeno od po jednog predstavnika Federalnog ministarstva finansija, Federalnog ministarstva zdravstva, Federalnog ministarstva rada i socijalne politike, Federalnog ministarstva obrazovanja i znanosti, Federalnog ministarstva kulture i sporta, Federalnog ministarstva razvoja, poduzetništva i obrta, i po jednog člana Odbora za rad i socijalnu skrb, Odbora za braniteljska i invalidska pitanja, Odbora za obrazovanje, znanost, kulturu i sport i Odbora za zdravstvo Zastupničkog doma Parlamenta Federacije Bosne i Hercegovine i Odbora za braniteljska i invalidska pitanja, rad, zdravstvenu i socijalnu skrb i Odbora za obrazovanje, znanost, kulturu, sport i pitanja mladih Doma naroda Parlamenta Federacije Bosne i Hercegovine.

Vlada Federacije posebnom odlukom utvrđuje listu korisnika kojima se raspodjeljuju sredstva iz stava 3. ovoga člana u procentualnom iznosu, a Federalno ministarstvo finansija u roku od 30 dana doznacava sredstva sukladno odluci Vlade Federacije mjerodavnim

ministarstvima u roku od 30 dana radi dodjele korisnicima i podnosi informaciju Parlamentu Federacije Bosne i Hercegovine.

Korisnici sredstava iz stava 3. ovoga člana podnose godišnje izvještaje o utrošku ovih sredstava mjerodavnom ministarstvu do kraja ožujka tekuće za prethodnu godinu. Utrošak sredstava suprotno Pravilniku o kriterijima iz stava 5. ovoga člana, automatski isključuje korisnika iz raspodjele za naredne dvije godine.

Član 18.

Lutrijom BiH rukovodi generalni direktor Lutrije BiH. Generalnog direktora Lutrije BiH imenuje Upravni odbor Lutrije BiH uz saglasnost Ministarstva na period od četiri godine.

Član 19.

Igre na sreću predviđene ovim zakonom Lutrija BiH može priređivati i u saradnji sa lutrijama drugih država, drugog entiteta, kao i sa drugim specijaliziranim organizacijama. Ministarstvo daje saglasnost za priređivanje igara na sreću iz stava 1. ovog člana.

Član 20.

Igre na sreću, predviđene ovim zakonom, Lutrija BiH može realizirati u poslovnoj saradnji sa drugim pravnim licima, trgovinskim, zanatskim i ugostiteljskim radnjama registrovanim, pored ostalog, i za promet robe i usluga.

Član 21.

Lutrija BiH može biti član EL (EUROPEAN LOTTERIES) European State Lotteries and Toto Association (Evropsko udruženje državnih lutrija i toto organizacija) i drugih međunarodnih strukovnih udruženja.

III – KLASIČNE IGRE NA SREĆU

1. Pravila klasičnih igara na sreću

Član 22.

Pravila igre na sreću su akt koji donosi priređivač igre na sreću kojim se regulišu prava i obaveze priređivača i učesnika u igri na sreću.

Pravila igre na sreću tombola - bingo u zatvorenom prostoru, koju priređuju druga pravna lica, odobrava Federalno ministarstvo finansija - Federalno ministarstvo financija - Porezna uprava (u daljem tekstu: Porezna uprava).

Član 23.

Uslovi za priređivanje pojedine klasične igre na sreću propisuju se pravilima igre koja za svaku vrstu igre donosi priređivač.

Član 24.

Pravila igre za privređivanje klasične igre na sreću obavezno moraju sadržavati slijedeće:

1. naziv i sjedište priređivača,
2. naziv, opis i vrijeme trajanja igre na sreću,
3. uslove za učestvovanje u igri na sreću,
4. mjesto na kojem se igra priređuje, odnosno teritoriju na kojoj se obavlja prodaja srećaka,
5. pojedinačnu cijenu srećke (kombinacije),
6. krajnji rok za učestvovanje u igri,

7. količinu i novčanu vrijednost emisije srećaka,
8. visinu fonda i vrstu dobitaka,
9. opis srećke i uplatnog listića,
10. način, postupak i nadzor izvlačenja, odnosno način utvrđivanja dobitaka,
11. način objavljivanja iznosa fonda dobitaka i rezultata igre,
12. način i rok isplate novčanih dobitaka,
13. način upoznavanja učesnika u igri sa pravilima igre,
14. postupak u slučaju otkazivanja izvlačenja.

Član 25.

Pravila klasičnih igara na sreću ne mogu se mijenjati nakon što je počela prodaja srećaka odnosno uplata određenog kola.

Priređivač klasičnih igara na sreću obavezan je pravila igara na sreću javno objaviti prije početka igre na sreću u dnevnoj štampi i licima zainteresovanim za učestvovanje u igri na prodajnim mjestima omogućiti upoznavanje sa pravilima učestvovanja u igri.

2. Izvlačenje dobitaka

Član 26.

U klasičnim igrama na sreću u kojima se dobitne kombinacije utvrđuju izvlačenjem izvlačenje se mora obavljati pred komisijom od najmanje tri člana koje imenuje priređivač.

Izvlačenje dobitaka mora biti uz nadzor ovlaštenog službenika Ministarstva.

Ako se klasične igre na sreću organiziraju na način utvrđen u članu 19. Zakona, a izvlačenje dobitaka obavlja na teritoriju druge države ili drugog entiteta, sastav povjerenstva i način izvlačenja bit će obavljani prema propisima koji se primjenjuju na teritoriju na kojem se vrši izvlačenje dobitaka.

Prije početka izvlačenja klasične lutrije priređivač mora utvrditi broj prodatih srećaka, te neprodane srećke zapečatiti pred komisijom i licem iz stava 2. ovog člana.

Član 27.

Ministarstvo može iz opravdanih razloga, na zahtjev priređivača, odobriti promjenu mjesta izvlačenja dobitaka ili dana izvlačenja, ali najduže za 15 dana.

Priređivač mora promjenu mjesta ili odgodu dana izvlačenja dobitaka objaviti na isti način na koji su objavljena pravila o priređivanju klasičnih igara na sreću.

Ako se, prema st. 1. i 2. ovog člana, odgodi dan izvlačenja dobitaka, priređivač može nastaviti prodavati srećke do dana određenog za izvlačenje.

Priređivač klasične igre na sreću može otkazati priređivanje igre na sreću, kolo ili seriju za koju je počeo prodavati srećke samo uz saglasnost Ministarstva i pod uvjetom da vrati uplaćeni novac od prodaje srećki.

Član 28.

O toku izvlačenja članovi komisije i ovlašteni službenik Ministarstva vode zapisnik kojeg svi potpisuju, a koji mora sadržavati: mjesto i vrijeme, način izvlačenja dobitaka, broj prodatih srećki, odnosno ukupnu uplatu u tom kolu ili seriji, izvučene dobitne kombinacije, te moguće primjedbe sudionika u igri.

Zapisnik o toku izvlačenja priređivač dostavlja Ministarstvu najkasnije u roku od sedam dana od dana obavljenog izvlačenja.

Član 29.

Izvještaj o rezultatima izvlačenja ili utvrđivanja dobitaka priređivač mora javno objaviti najkasnije u roku od sedam dana od dana izvlačenja u dnevnom listu i na prodajnim mjestima.

3. Fond dobitaka i isplata

Član 30.

Fond dobitaka u klasičnim igrama na sreću utvrđuje se od osnovice koju čini ukupna vrijednost emisije srećaka ili ukupna vrijednost uplate za sudjelovanje u igri lota, sportske prognoze, toto, TV tombole i tombole - bingo u zatvorenom prostoru.

Iznos fonda dobitaka u pojedinoj igri na sreću iz stava 1. ovog člana po pojedinom kolu ili seriji igre na sreću mora biti objavljen prije izvlačenja dobitaka.

Fond dobitaka u pojedinoj igri na sreću, odnosno u pojedinom kolu ili seriji igre na sreću mora iznositi najmanje 50% osnovice iz stava 1. ovog člana i isplaćuje se u skladu s pravilima igre na sreću.

Fond dobitaka za TV tombolu i tombolu - bingo u zatvorenom prostoru utvrđuje se u fiksnom iznosu od 60% za svaki ciklus igre.

Član 31.

Isplata novčanog dobitka, odnosno preuzimanje dobitaka druge vrste u klasičnim igrama na sreću, obavlja se u roku određenom pravilima igre na sreću koji ne može biti duži od 60 dana od dana objavljivanja izvještaja o rezultatu igre na sreću.

Nadležna služba kontrole Lutrije BiH i komisija koju odredi privredno društvo precizno evidentira broj i ukupnu sumu neisplaćenih dobitaka po svakoj pojedinoj igri na sreću.

Sredstva iz stava 2. ovog člana se moraju vratiti igračima kroz uvećanje fonda dobitaka iz konkretne ili druge igre na sreću.

O dinamici isplate ovih sredstava odlučuje generalni direktor Lutrije BiH o čemu obavještava Ministarstvo.

4. Štampanje srećaka, listića

Član 32.

Srećke (robne, novčane, robno-novčane), tombolske listiće i druge potvrde za učešće u igri iz člana 3. stav 4. ovog zakona, izuzev srećaka ekspres i instant lutrije, mogu se štampati isključivo u štampariji koju ovlasti Ministarstvo na prijedlog Lutrije BiH.

Srećke ekspres i instant lutrije mogu štampati štamparije koje ispunjavaju slijedeće uvjete:

- da se radi o eminentnom proizvođaču koji radi, odnosno štampa za veći broj lutrijskih organizacija koje su punopravni članovi EUROPEAN LOTTERIES,
- da odabrani proizvođač, ugovorom o konkretnom poslu, garantuje najmanje: tačnost fonda dobitaka, dogovoreni broj dobitnih i nedobitnih srećaka i njihov raspored, kvalitet proizvoda kroz sigurnost i kvalitet emulzije, garantuje tajnost podataka.

Odluku o odabiru štamparije iz stava 2. ovog člana donosi generalni direktor Lutrije BiH.

5. Lutrija

Član 33.

Lutrija može biti, prema strukturi fonda dobitaka:

- robna,
- novčana i
- robno - novčana.

Lutrija može biti, prema načinu izvlačenja dobitaka:

- klasična sa tačno utvrđenim datumom izvlačenja i
- ekspres i instant kod kojih je dobitak odštampan na srećki.

6. Loto, keno i druge varijate ove igre

Član 34.

Loto je klasična igra na sreću u kojoj se izvlačenje brojeva vrši sa lopticama gdje se putem elektroničkog uređaja vrši izvlačenje brojeva koji, u skladu sa pravilima igre, predstavljaju dobitak.

Član 35.

Izvlačenje dobitaka lota vrši se javno, direktno u TV prijenosu.

Član 36.

Loptice za loto, keno i druge varijante ove igre trebaju imati odgovarajući atest od proizvođača loptica u skladu sa pravilima igre na sreću.

7. Sportska prognoza – Toto

Član 37.

Sportska prognoza - Toto je igra na sreću zasnovana na prognoziranju rezultata nogometnih takmičenja domaćih ili stranih liga jednom ili više puta sedmično.

Član 38.

U zavisnosti od ponude može se vršiti kombinacija parova, a u izuzetnim slučajevima prognoziranje prvog i drugog poluvremena jedne utakmice.

8. Sistem automata

Član 39.

Sistem automata podrazumijeva telekomunikacijsko povezivanje većeg broja automata za igre na sreću u cilju formiranja jedinstvenog jack - pota sa istim i istovremenim šansama svih učesnika u igri.

Lutrija BiH, kao isključivi priređivač ove igre ima pravo u sistem uvezati maksimalno 1.000 aparata.

Član 40.

Lutrija BiH je dužna osigurati otvorenu (on-line) vezu sa Ministarstvom u cilju trenutnog i kontinuiranog uvida nadležnog organa u visinu ostvarenog prometa i povlačenja jack - pota.

Član 41.

Vrstu i performanse automata će utvrditi Vlada posebnom odlukom na prijedlog Ministarstva i Lutrije BiH.

Član 42.

Telekomunikacijske usluge idu na teret Lutrije BiH.

Član 43.

Visina jack - pota i procenat dobitka u pojedinačnim igrama na sistemu automata regulisat će se pravilima ove igre na sreću.

Član 44.

Priređivači igara na sreću, njegovi članovi, partneri, zaposleni, kao i druga lica koja rade za priređivača, obavezni su čuvati tajnu o igračima i njihovom sudjelovanju u igri.

Ako radnici nadležnih tijela uprave u obavljanju svojih poslova saznaju za činjenice koje podliježu tajnosti iz stava 1. ovog člana, obavezni su ih čuvati kao službenu tajnu.

9. TV tombola – bingo

Član 45.

TV tombola - bingo je igra na sreću u kojoj se javno izvlače brojevi i to u direktnom TV prijenosu.

Priređivanje TV tombole – bingo je isključivo pravo Lutrije BiH.

Izvlačenje dobitaka u direktnom TV prijenosu može vršiti samo Lutrija BiH.

10. Tombola-bingo u zatvorenom prostoru

Član 46.

Tombola - bingo u zatvorenom prostoru je igra na sreću koju priređuju druga pravna lica na osnovu odobrenja Porezne uprave.

Odobrenje iz stava 1. ovog člana izdaje se na godinu pod uvjetom da je podnosilac zahtjeva:

- registrovan za priređivanje ove vrste igre na sreću;
- vlasnik neophodne opreme za priređivanje ove igre na sreću;
- osigurao adekvatan prostor sa tačno naznačenom adresom;
- omogućio fizički pristup igrača u prostoru u kojem se igra priređuje, a da se isti ne nalazi u neposrednoj blizini vjerskih, historijskih i obrazovnih ustanova i objekata;
- donio pravila igre sa ugrađenim instrumentima kontrole.

Član 47.

Priređivači tombole - bingo u zatvorenom prostoru ne mogu se udruživati radi zajedničkog priređivanja ove igre na području dvije ili više općina.

Član 48.

Priređivač tombole - bingo u zatvorenom prostoru može stavljati u promet samo tombolske kartice koje je izdala Lutrija BiH.

Tombolske kartice se mogu isključivo prodavati - distribuirati u prostoru u kojem se igra priređuje.

Cijena tombolske kartice je jedinstvena na teritoriji Federacije i utvrđuje je Ministarstvo na prijedlog Lutrije BiH.

Lutrija BiH može izdati tombolske kartice samo priređivaču koji ima odobrenje Porezne uprave za priređivanje tombole - bingo u zatvorenom prostoru. Lutrija BiH je dužna za svakoga priređivača tombole - bingo u zatvorenom prostoru voditi evidenciju o količinama i serijama izdatih tombolskih kartica.

Konačan rezultat igre evidentira se svakodnevno za svaku igru pojedinačno na posebnom obrascu (bordero).

Član 49.

Tombola - bingo u zatvorenom prostoru se može priređivati jednom i više puta sedmično, a u skladu sa pravilima igre.

IV – POSEBNE IGRE NA SREĆU

1. Pravila igre za posebne igre na sreću

Član 50.

Za svaku vrstu posebnih igara na sreću donose se pravila koja moraju odgovarati uobičajenim dobrim poslovnim običajima, a primjenju se po odobrenju Ministarstva.

Pravila posebnih igara na sreću za svaku vrstu igre donosi priređivač igre.

Pravila posebnih igara na sreću moraju biti sastavljena na jezicima konstitutivnih naroda, latiničnim i ćiriličnim pismom, a za kasino prevedena na najmanje dva svjetska jezika, te igračima moraju uvijek biti dostupna.

U toku trajanja igre na sreću koju su igrači započeli po uplati iznosa za učestvovanje u jednoj igri na sreću, pravila igre ne mogu se mijenjati te se do završetka ista igra odvija po istim pravilima.

Član 51.

Pristup kasinu i klubovima za igre na sreću na automatima i kladionicama dopušten je samo punoljetnim licima koja su dokazala svoj identitet. Osobe u uniformi imaju pristup samo pri vršenju svoje službe ili uz saglasnost uprave kasina.

Posjetiocima kasina nije dopušteno donošenje tehničkih pomagala koja su prikladna da pribave njima i drugima prednost u igri.

2. Fond dobitaka i isplata.

Član 52.

Fond dobitaka kod posebnih igara na sreću ne utvrđuje se unaprijed.

Član 53.

Automat za igre na sreću mora biti tako programiran da osigura minimalnu isplatu od 70% od ukupne uplate u periodu od tri mjeseca u što nije uključen rizik klađenja na već ostvaren dobitak.

Član 54.

U kasinu fond dobitaka ne utvrđuje se.

Vrsta i visina dobitaka se isplaćuje na licu mjesta poslije svakog ciklusa igre.

Član 55.

Ukoliko su na kraju radnog vremena ukupne uplate veće od isplate, ta razlika predstavlja dobitak, a obratno gubitak kasina.

3. Igre u kasinu

Član 56.

Kasino je namjenski prostor za priređivanje posebnih igara na sreću koje se priređuju na stolovima za igru sa kuglicama, kockama ili kartama (rulet, boule, chemin der fer, black Yack, trrente qurante, baccarat, carps i sl.).

Kasino se sastoji od dijela za igre, ugostiteljskog dijela i pomoćnih prostora.

Član 57.

Posebne igre na sreću u kasinu može priređivati Lutrija BiH.

Pored Lutrije BiH, igre na sreću u kasinu mogu priređivati i privredna društva registrovana isključivo za djelatnost kockarnica i kladionica sa sjedištem na teritoriji Federacije, koja se

upisuju u sudski registar za obavljanje djelatnosti kockarnica i kladionica na osnovu odobrenja Ministarstva.

Na privredna društva iz stava 2. ovog člana primjenjuju se odredbe Zakona o privrednim društvima ako ovim zakonom nije drugačije urađeno.

Član 58.

Visina osnivačkog kapitala privrednog društva ne može biti manja od visine početne rezerve sigurnosti.

Novčani iznos početne rezerve sigurnosti ne može biti manji od 1,000.000 KM, sa izuzetkom Lutrije BiH.

Iznos početne rezerve sigurnosti se uplaćuje u KM.

Ministarstvo jedanput godišnje utvrđuje visinu iznosa iz stava 2. ovog člana.

Član 59.

Ministarstvo će izdati odobrenje za registraciju privrednog društva iz člana 57. stav 2. ovog zakona ako to društvo:

1. podnese dokaze da je izvršilo polog novčanog dijela osnivačkog kapitala i početne rezerve sigurnosti na račun koji odredi Ministarstvo,
2. dostavi ugovor o osnivanju sa podacima o osnivačima, visinu pojedinačnih uloga, ime i naziv osnivača i vjerodostojnu dokumentaciju o cjelokupnoj nepokretnoj imovini osnivača,
3. osigura instrument založnog prava na imovinu osnivača koji odabere Ministarstvo ili bankarsku garanciju na iznos koji odredi Ministarstvo,
4. dostavi elaborat o osnivanju i poslovanju kasina,
5. dostavi pravila o radu kasina i
6. dostavi pravila za svaku vrstu igre na sreću koja će se priređivati u kasinu.

Član 60.

Za priređivanje igara u kasinu Lutrija BiH i privredna društva moraju ispunjavati slijedeće uvjete:

1. da se kasino nalazi u posebnoj prostoriji ili ugostiteljskom objektu hotelu sa četiri ili pet zvjezdica,
2. da posjeduju dokaz da su suvlasnici prostora ili ugovor o korištenju prostora za igru, kao i tlocrt istog, a koji skupa sa ugostiteljskim dijelom i pomoćnim prostorima čini prostor prostorno i funkcionalno jedinstvenu cjelinu čija veličina ne može biti manja od 500 m²,
3. da su radnici posebno osposobljeni za rad u kasinu, da govore najmanje dva svjetska jezika i da su u radnom odnosu na neodređeno vrijeme,
4. da je donesen pravilnik o radu kasina i pravila za svaku pojedinu vrstu igre koja se priređuje u kasinu,
5. da ima najmanje pet stolova,
6. da ima blagajnu i mjenjačnicu,
7. da ima osiguran audio i vizuelni nadzor uz kontinuirano snimanje,
8. da ima nadzor ulaska i izlaska,
9. da ima osiguranje i tjelesnu zaštitu igrača i posjetitelja u skladu sa Zakonom o zaštiti lica i imovine,
10. da ima poseban prostor za čuvanje novca i vrijednosti.

Dokaze o ispunjavanju uslova iz stava 1. ovog člana podnosi priređivač, a Ministarstvo potvrđuje da su ispunjeni uslovi iz stava 1. tač. 1. i 2. ovog člana.

Član 61.

Ministarstvo je dužno u roku od 60 dana od dana podnošenja zahtjeva i dokaza iz čl. 59. i 60. ovog zakona donijeti rješenje kojim odlučuje o zahtjevu privrednog društva.

U roku iz stava 1. ovog člana, Ministarstvo je dužno ispitati bonitet, kao i zakonitost i ispravnost dosadašnjeg poslovanja i ponašanja osnivača privrednog društva, odnosno vlasnika privrednog društva.

Odobrenje iz stava 1. ovog člana izdaje se na period od dvije godine. Priređivač je dužan, nakon podnošenja zahtjeva za produženje odobrenja, prezentirati izvještaj o poslovanju za prethodnu godinu.

Ukoliko rezultati poslovanja nisu zadovoljavajući, a što cijeni Ministarstvo, zahtjev može biti odbijen.

Rješenjem kojim se daje odobrenje za priređivanje igara na sreću u kasinu daje se i saglasnost na pravila pojedinih igara koje se priređuju u kasinu.

Član 62.

Društvo je dužno početi sa radom u roku od 15 dana od dana upisa u sudski registar.

Član 63.

Poslovanje u kasinu se obavlja u stranim i domaćim sredstvima plaćanja, a finansijski rezultat se iskazuje u KM.

Član 64.

Sredstva početnih rezervi sigurnosti imaju karakter osiguranja dobitaka, a koriste se kad su iscrpljena sva ostala sredstva, sa kojima raspolaže priređivač.

Ako se sredstva početnih rezervi iz člana 58. ovog zakona smanje do 50% priređivač prestaje sa radom.

Ako priređivač u roku od 30 dana od dana kada su početne rezerve smanjene ispod 50% ne popuni početnu rezervu u skladu sa član 58. ovog zakona, ukida se odobrenje za priređivanje igre na sreću u kasinu i privredno društvo se briše iz sudskog registra, uz prethodno namirenje svih obaveza prema Federaciji i primjene instrumenata založnog prava i realizacije bankarske garancije.

Član 65.

Svaki objekat kasina mora imati ugrađen atestirani video nadzor koji se stavlja u funkciju početkom, a prestaje po završetku radnog vremena.

Stav 1. ovog člana se odnosi na tzv. "živu igru" u kasinu, odnosno sve igre (rulet, black jack i dr.) u kojima kontinuirano i neposredno učestvuju radnici zaposleni u kasinu.

Priređivač je dužan video zapis čuvati na osiguranom mjestu najmanje sedam neradnih dana.

Član 66.

U objektu kasina je obavezno prisustvo jednog ili više članova nadležnog organa zaduženog za nadzor nad primjenom ovog zakona.

Lica iz stava 1. ovog člana su obavezni potpisnici bordero-a i druge dokumentacije propisane pravilnikom o radu kasina koje potvrđuje Ministarstvo.

Član 67.

Kasino mora imati odvojen prostor za pružanje ugostiteljskih usluga u kojem se poslužuje piće (kafe-bar i sl.), a može imati i ugostiteljski objekat u kojem se pripremaju i poslužuju jela (restoran i sl.).

Član 68.

Uslove za ulazak u kasino određuje nosilac odobrenja pri čemu pojedinim licima ili grupama može zabraniti ulaz, a da ne mora navesti razloge za takvu odluku. Igračima koji u toku igre na sreću prekrše pravila igre na sreću može se zabraniti daljnje učestvovanje u igri.

4. Igre na automatima i posebnim klubovima

Član 69.

Posebne igre na sreću na automatima u posebnim klubovima mogu se priređivati samo na automatima i drugim napravama za igre na sreću s mogućnošću višestrukog uloga i dobitka (multiplayer) u klubovima sa najmanje 20 automata.

Odredba stava 1. ovog člana ne odnosi se na Lutriju BiH.

Automati za igre na sreću su aparati (uređaji) koji se stavljaju u pogon:

- ubacivanjem žetona ili navijanjem putem ključa ili
- daljinskim upravljačem.

Stavljanje automata u pogon na način iz stava 3. ovog člana, uslovljeno je prethodnim plaćanjem u cilju da se ostvari dobitak u novcu koji zavisi isključivo od slučaja.

Posebne igre na automatima mogu priređivati Lutrija BiH i privredna društva registrovana isključivo za ovu vrstu igre na sreću.

Član 70.

Ukupan broj klubova u kojima se priređuju igre na sreću na automatima, a koji mogu djelovati na teritoriji Federacije utvrđuje Vlada na prijedlog Ministarstva i Upravnog odbora Lutrije BiH.

Član 71.

Priređivanje igara na sreću putem automata u posebnim klubovima vrše privredna društva koja imaju sjedište u Federaciji i ispunjavaju uslove u skladu sa ovim zakonom uz odobrenje Ministarstva.

Ministarstvo izdaje odobrenje privrednim društvima koja ispunjavaju sljedeće uvjete:

- da je registrovano za privređivanje ove vrste igre na sreću,
- da je vlasnik automata,
- da je osiguran adekvatan prostor za smještaj najmanje 20 automata, te da se isti ne nalazi u neposrednoj bilizini vjerskih, historijskih i obrazovnih ustanova i objekata,
- da su donijeta pravila igre na sreću,
- potvrda da je automat tako konstruisan i podešen da osigura dobitak od 70% od ukupne uplate u što nije uključeno klađenje sa daljom igrom "veća" -"manja",
- dokaz ovlaštene pravne osobe o uspostavljenj otvorenoj on-line mreži povezanoj s Poreznom upravom - Središnjim uredom Sarajevo.

Pored uvjeta iz stava 2. ovog člana podnosilac zahtjeva podliježe provjeri Ministarstva po pitanju lokaliteta poslovnog objekta u koji se postavljaju aparati, vlasništva nad automatima kao i u pogledu zakonitosti i ispravnosti u dosadašnjem poslovanju i ponašanju.

Rješenje kojim se izdaje odobrenje za priređivanje igara na sreću putem automata za igre na sreću u posebnim klubovima ujedno je i davanje saglasnosti Ministarstva na akte iz stava 2. ovog člana.

Član 72.

Za vrijeme igre na automatu zabranjena je upotreba bilo kojih pomoćnih sredstava ili vještina u cilju sticanja dobitka, u protivnom je priređivač dužan spriječiti isplatu istog.

Član 73.

Odobrenje iz člana 71. ovog zakona izdaje se na period od godinu sa tačno utvrđenim brojem i vrstom automata i njihovom lokacijom.

Prije isteka roka iz stava 1. ovog člana privredno društvo mora dostaviti zahtjev za produženje odobrenja.

Uz zahtjev za produženje odobrenja privredno društvo podnosi izvještaj o poslovanju za prethodnu godinu. Ukoliko rezultati poslovanja nisu zadovoljavajući, a što cijeni Ministarstvo, zahtjev može biti odbijen.

Član 74.

Automati i stolovi za igre na sreću prilikom stavljanja u upotrebu u kasinu ili automat klubu, moraju biti tehnički ispravni.

U upotrebi ne mogu biti automati za igre na sreću stariji od pet godina od dana njihove proizvodnje, što se ne odnosi na već zatečene legalne automate.

Lutrija BiH je dužna u roku od tri godine prilagoditi se odredbama ovog stava.

Automati za igre na sreću, koji se stavljaju u upotrebu moraju imati elektronske brojčanike kao automatske informacijske baze podataka (total registre) za upis i osiguranje podataka o sveukupnom radu automata otvorenu on-line mrežu povezanu putem servera s Poreznom upravom - Središnjim uredom Sarajevo, kao i ugrađen kontrolni mehanički uređaj koji bilježi promet automata.

Troškovi telekomunikacijske usluge i uspostava sustava otvorene on-line mreže idu na teret priređivanja.

Uvjeti i način na koji će se bilježiti i snimati promet, propisat će Ministarstvo.

Član 75.

Prije stavljanja automata za igre na sreću u upotrebu obavlja se tehnički pregled o čemu se daje uvjerenje o ispravnosti istih.

Pri kontroli automata koji su prvi put stavljeni u upotrebu, pravno lice koje ih stavlja u upotrebu obavezno je ovlaštenom licu za tehnički pregled dati na uvid uvjerenje i garanciju proizvođača automata.

Tehnički pregled automata za igre na sreću mogu obavljati pravna lica koja ne obavljaju djelatnost priređivanja igara na sreću i iznajmljivanje automata i to na osnovu posebnog ovlaštenja Ministarstva.

Uvjerenje o ispravnosti automata za igre na sreću vrijedi jednu godinu i mora se obnoviti prije isteka tog roka.

Član 76.

U upotrebi mogu biti automati i stolovi za igre na sreću samo ako je na njima na vidnom mjestu istaknuta posebna naljepnica za označavanje i registraciju s podacima o vrsti naprave, lokaciji, važećem roku i serijskom broju naljepnice, te o priređivaču igara.

Priređivači igara preuzet će kod Ministarstva posebne naljepnice za registraciju nakon dostavljenog dokaza o plaćenju naknadi iz člana 86. stav 3. tačka 1.a ovog zakona.

Evidenciju o izdatim posebnim naljepnicama za registraciju vodi nadležna Porezna uprava.

Član 77.

Priređivač igre mora svaki automat ili stol za igre na sreću prije stavljanja u upotrebu ili povlačenja iz upotrebe, kao i premještanje - prijaviti nadležnom organu za izdavanje odobrenja sedam dana prije dana kada to namjerava učiniti.

Član 78.

Automat za igre na sreću mora biti tako konstruisan odnosno podešen da na ukupan broj programiranih kombinacija isplaćuje igračima najmanje 70% od vrijednosti uplata za

sudjelovanje u igrama na sreću u periodu od tri mjeseca u što nije uključen rizik klađenja na već ostvaren dobitak, uz bilježenje ulaza i izlaza putem mehaničkih brojčanika.

Priredivac igara na sreću na automatima u posebnim klubovima obavezan je u svom sjedištu imati tjedne zapise sa servera o uplatama i isplatama, u elektronskome obliku, čiji rok čuvanja ne može biti kraci od dvije godine.

5. Klađenje

Član 79.

Klađenje na sportske rezultate i druge neizvjesne događaje je posebna igra na sreću.

Član 80.

Raznovrsna klađenja mogu priređivati Lutrija BiH i privredna društva sa sjedištem u Federaciji registrovana isključivo za ovu vrstu igre na sreću.

Privredna društva mogu priređivati raznovrsna klađenja u za to posebno uređenim prostorijama i na osnovu odobrenja Ministarstva.

Na uplatnom mjestu ne mogu se priređivati pojedinačna klađenja na automatima i klađenje uživo.

Igre na sreću kladenjem iz stava 3. ovoga članka mogu se priređivati samo pod uvjetima propisanim članom 86. Zakona.

Član 81.

Priređivač igre iz člana 80. ovog zakona (u daljem tekstu: kladioničar) mora ispunjavati slijedeće uvjete:

- da je legalni korisnik prostora u kojem se priređuje igra na sreću - klađenje,
- da ima najmanje dva uplatna mjesta,
- uplatno mjesto i centralni kompjuterski zapis "centrala" moraju biti telekomunikacijski povezani,
- kladioničar mora biti vlasnik opreme koja je neophodna za priređivanje ove igre na sreću,
- dokaz o uplati osnovnog kapitala.

Odobrenje se izdaje privrednom društvu na period od godinu.

Privredno društvo je dužno uz zahtjev za produženje odobrenja dostaviti izvještaj o poslovanju za prethodnu godinu. Ukoliko rezultati poslovanja nisu zadovoljavajući, a što cijeni Ministarstvo, zahtjev se može odbiti.

Član 82.

Opis klađenja i uslove klađenja, priređivač igre je dužan propisati pravilima igre klađenja.

Član 83.

Privredno društvo kojem se daje odobrenje za priređivanje klađenja mora raspolagati osnovnim kapitalom najmanje u vrijednosti od 500.000,00 KM.

Radi osiguranja isplata dobitaka igračima i podmirenja obaveza kladioničar mora neprekidno, u razdoblju za koje je odobrenje dato, u banci sa sjedištem na teritoriji Federacije koju izabere Ministarstvo imati polog rezervi sigurnosti u iznosu od najmanje 50% od vrijednosti osnovnog kapitala iz stava 2. ovog člana.

Član 84.

Telekomunikacijska oprema iz članka 81. Zakona mora biti on-line, odnosno otvorena mreža.

Uplatna mjesta moraju biti uvezana otvorenom on-line vezom putem centralnog servera priredivaca s Poreznom upravom - Središnjim uredom.

Član 85.

Kladionicar je obvezan u svom sjedištu imati tjedne zapise sa servera o uplatama i isplatama, u elektronskome obliku, čiji rok čuvanja ne može biti kraci od dvije godine.

V - NAKNADE ZA PRIREĐIVANJE IGARA NA SREĆU

Član 86.

Za izdavanje odobrenja za priređivanje igre na sreću, odobrenje pravila igara na sreću za produženje odobrenja za priređivanje igara na sreću i za otvaranje nove lokacije plaća se naknada.

Naknade iz stava 1. ovog člana su prihod Federacije.

Naknada iz stava 1. ovog člana plaća se za:

1. Odobrenje za priređivanje igre:

- a) na automatima u posebnim klubovima
 - za odobrenje za otvaranje kluba 50.000,00 KM
 - za 20 automata 20.000,00 KM
 - za svaki daljnji automat 500,00 KM
 - za produženje odobrenja 10.000,00 KM
- b) u kasinu
 - za odobrenje za otvaranje kasina 500.000,00 KM
 - za odobrenje pravila jedne igre 1.000,00 KM
 - za odobrenje pravila rada kasina 1.000,00 KM
 - za produženje odobrenja 100.000,00 KM
- c) u kladionicama
 - za izdavanje odobrenja 50.000,00 KM
 - za odobrenje pravila igre 1.000,00 KM
 - za otvaranje svake nove lokacije 10.000,00 KM
 - za produženje odobrenja 10.000,00 KM
- d) tombola - bingo u zatvorenom prostoru
 - za odobrenje za priređivanje igre 5.000,00 KM
 - za odobrenje pravila igre 500,00 KM
 - za produženje odobrenja 1.000,00 KM

Bez dokaza o plaćenju naknadi iz stava 2. ovog člana ne može se izdati odobrenje i otpočeti sa radom.

Naknade iz stava 1. ovog člana ne odnose se na Lutriju BiH.

VI – NADZOR

Član 87.

Nadzor nad provođenjem odredaba ovog zakona vrši Ministarstvo.

Lutrija BiH i privredno društvo koje priređuje igre na sreću u kasinu obavezni su omogućiti nadzor cjelokupnog materijalno-finansijskog poslovanja svakodnevno.

Ovlašteni službenik iz stava 1. ovog člana ima pravo u obavljanju nadzora pregledati poslovne prostorije i sve postupke koji su vezani za priređivanje igara na sreću, naprave i pomagala za priređivanje igara na sreću, naprave za nadzor nad izvođenjem igara na sreću, audio i video naprave i pomagala, poslovne knjige, izvještaje, evidencije i druge dokumente ili podatke koji omogućavaju utvrđivanje stanja.

Ako u obavljanju inspekcijskog nadzora ovlašteni službenik iz stava 1. ovoga člana utvrdi da se priređuju igre na sreću iz člana 3. Zakona suprotno odredbama ovoga zakona, donijet će

rješenje o zabrani priređivanja igara na sreću i privremeno zapecatiti prostor u kojem se priređuju igre na sreću, te pokrenuti prekršajni postupak.

VII – KAZNE ODREDBE

Član 88.

Novčanom kaznom u iznosu od 3.000,00 KM do 15.000,00 KM kaznit će se za prekršaj pravno lice ako:

1. priređuje igre na sreću suprotno odredbama ovog zakona (čl. 9., 10., 11. i 12.),
2. promjeni pravila pojedinog kola ili serije klasične igre na sreću nakon što je počela prodaja srećaka igre na sreću toga kola, odnosno serije i ako bez odobrenja odgodi dan ili mjesto izvlačenja dobitaka (čl. 25. i 27.),
3. obavi izvlačenje dobitaka bez prisustva ovlaštenog službenika Ministarstva (član 26.), prije izvlačenja ne utvrdi broj prodatih srećaka, a neoprodane ne zapečati ili uništi pred komisijom (član 26.),
4. dobitke ne isplaćuje u roku utvrđenom pravilima igre (član 31.),
5. upotrijebi loptice koje nemaju odgovarajući atest proizvođača (član 36.),
6. pri priređivanju igre na sreću u sistem uveze više od 1.000 automata (član 39.),
7. stavlja u promet tombolske kartice koje nije izdala Lutrija BiH (član 48.),
8. priređuje igru na sreću bez odgovarajućeg odobrenja (čl. 57., 71. i 80),
9. nastavi priređivati igre i ako ne ispunjava bilo koji od uslova za priređivanje posebne igre na sreću u kasinu ili automat klubu (član 76.),
10. prilikom obavljanja nadzora ne omogući ovlaštenim organima pregled poslovne dokumentacije, poslovnih prostorija, pomagala, naprava ili onemogući nadzor cjelokupnog materijalno-finansijskog poslovanja (član 87.),
11. ako dozvoli pristup kasinu, klubovima za igre na sreću na automatima i kladionicama maloljetnim osobama, odnosno osobama koje nisu dokazale identitet.

Za prekršaj iz stava 1. ovog člana kaznit će se i odgovorno lice u pravnom licu novčanom kaznom u iznosu od 1.500,00 do 3.000,00 KM.

Pored novčane kazne pravnoj osobi za ucinjene prekršaje iz ovoga člana, bit će izrečena i zaštitna mjera oduzimanja sredstava i predmeta koji su korišteni za priređivanje igara na sreću.

Član 88a.

Novčanom kaznom u iznosu od 1.500,00 KM bit će kažnjen za prekršaj građanin i poduzetnik ako priređuje igre na sreću iz člana 3. Zakona.

Pored novčane kazne građaninu i poduzetniku za ucinjene prekršaje iz stava 1. ovoga člana, bit će izrečena i zaštitna mjera oduzimanja svih sredstava i predmeta koji su korišteni ili koji se mogu upotrijebiti za priređivanje igara na sreću, kao i zabrana obavljanja djelatnosti priređivanja igara na sreću.

VIII – PRELAZNE I ZAVRŠNE ODREDBE

Član 89.

Do uspostavljanja sistema automata Lutrija BiH ima pravo koristiti već zatečene i uredno prijavljene automate u skladu sa članom 74. stav 2. ovog zakona.

Član 90.

Stečeno pravo za priređivanje igara na sreću, odnosno odobrenja za priređivanje igara na sreću, ne mogu se prenositi na druga pravna lica.

Član 91.

Privredna društva koja igre na sreću priređuju u kasinu i automat klubovima, na osnovu odobrenja datih do stupanja na snagu ovog zakona, nastavljaju sa radom do isteka roka važenja odobrenja, a u slučaju da rok važenja odobrenja nije određen, najduže tri mjeseca od dana stupanja na snagu ovog zakona.

Privredno društvo, kojem odobrenje za priređivanje igara na sreću u kasinu i automat klubovima važi do kraja godine, može nastaviti sa radom pod uslovom da u roku od tri mjeseca od dana stupanja na snagu ovog zakona usklade svoj rad, akte i poslovanje s odredbama ovog zakona.

Svi postupci započeti radi davanja odobrenja za priređivanje posebnih igara u kasinu i automat klubovima u kojima nije donijeto konačno rješenje dovršit će se po odredbama ovog zakona.

Član 91a.

Svi priredivaci igara na sreću dužni su uskladiti svoj rad s ovim zakonom u roku od tri godine od dana stupanja na snagu ovoga zakona.

Član 92.

Provedbene propise o primjeni ovog zakona donijet će federalni ministar finansija u roku od 60 dana od dana stupanja na snagu ovog zakona.

Član 93.

Stupanjem na snagu ovog zakona prestaje primjena zakona i drugih propisa o igrama na sreću koji su se primjenjivali na teritoriji Federacije do dana stupanja na snagu ovog zakona.

Član 94.

Ovaj zakon stupa na snagu narednog dana od dana objavljivanja u "Službenim novinama Federacije BiH".